

*tanorum oppidum, quod ab suis vi atque armis classis reipublicæ præfectus cepisset, Senatus restitueret, atque a Ferdinando auxiliis iuvando abstineret.* quarum is rerum neutra impetrata discessit. Carolo in Galliam profecto, filius, quem unicum habebat, tres natus annos moritur. qua quidem morte accidit, ut cum postea Carolus iterum exercitum coegisset, quem ad Ferdinandum repellendum Aloisio propinquo suo duce mari Cajetam mitteret, Aloisius, cui regnum Galliæ, Carolo sine liberis maribus moriente, lege Gallorum obveniebat, profectioem respuerit. Itaque Carolus, cum alio duce nollet exercitum mittere, rem jam prope confectam distulit: pauloque post dilapsis cunctando militibus, ea omnino missio magnis impensis instituta, certissimaque iis, quos Neapoli reliquerat, ducibus cum verbis tum literis ac nunciis promissa totiens auxilia, interpositaque regia fides, ad nihilum reciderunt.

Ludovicus autem Gallici belli metu deposito, cum id quod Pisarum civitas a Senatu petierat, amicorum literis cognovisset, Pisani vero patefacta ipsorum postulatione legatos etiam palam Venetias eadem de re misissent, ne id quod verebatur accideret, uti ea civitas sub unius reipublicæ imperium redigeretur, se se Senatui obtulit, si Pisas esse defendendas existimaret, ejus rei socium & adiutorem futurum: videri autem sibi, æquissimum esse eas defendi, propterea quod Florentini fœdus cum Carolo percussissent, cujus ipse fœderis legatum occulte ad Carolum proficiscentem suis in finibus interceperit. Re sæpius a Patribus agitata, Ludovico magis magisque quotidie adnitente, lex tandem in Senatu lata est, fœderatorum omnium legatis approbantibus, uti Alexandri, & reipublicæ ac Ludovici armis atque opibus Pisæ defenderentur: additumque legi, ut in Liguribus milites bis mille reipublicæ pecunia conscriberentur, Pisasque mitterentur. id autem uti Ligures permetterent, Ludovicus antea se receperat effecturum. Iis intellectis rebus Florentini, antequam auxilia contra se convenirent, omni cura dili-

*Pisarum defensio a Senatu suscipitur.*